



**Sabtu, 15 Januari 2022**  
**Esekiel 25: 1-7**



**Tuhan Ngukum Amon**



Isuratken Nabi Esekiel tahu-tuhu Dibata merawa nandangi Israel si erdosa dingen lanai setia man Dibata. Merawa Dibata i bas lagu langkah bangsa e si lanai adil kempak saph-saph ia, La ngena ate Dibata i bas bangsaNa e nindih kalak si mesera dingen medanggal kegeluhenna. Dibata enggo nehken rawaNa. Saja, i bas igombangi bangsa sideban e bangsa Israel, itawaina, meriah ukurna ngidah Dibata Israel ngukum bangsana. Merawa Dibata e nandangi bangsas ideban e, e me Amon. E maka man Bangsa Amon pe la tanggung kelekna ibahan Dibata ukumenna. Kai ukumen Dibata man Amon? Ipelepasna suku-suku si ringan i gurun pasir si arah timur naluken ia. Kerina si kerajanggenna ulih taneh ras ulih jumana nari ipangani kalak sideban. Salihken Dibata rambah jadi karang unta. Enda me persinget man Amon gelah olanai igombangina Israel.

Ngidah kerna turi-turinna Dibata merawa man Amon, kerna igombangina Israel. Banci ka nge Moria pe minter teringet kerna jabuna. Adina nande ngerawai anakna sada kewajaren iakap, tapi adina lit kalak sideban nggombang-nggombang anakna entah ngerawai anakna tahu-tuhu sakit kel iakapna. Banci nge irawai Moria e anakna, iukumna pe. Tapi leseukurna adina irawai kalak sideban ka anakna.

Dibata erkeleng ate nandangi bangsaNa, Dibata tetap ngalemi dingen engekengi Israel amin gia enggo ibahanna kesalahen si erbanca ceda ukur Dibata. Keleng ate Dibata e pe lit man banta kerina, kita nggeluh dem alu kekurangan, mawen erbanca Dibata kecewa bas kegeluhenta. Tapi, tetap nge kita ikelengiNa, labo ipediatNa kita i bas kesusahen ukur, labo ipediatNa ceda ateta sabab kita anak-anak si ikelengiNa. Bage gia, enda me dalanna kita erlajar guna mperobahi lagu langkahta gelah ola lalap ncedaken ukur Dibata.

**Dibata tetap njaga dingen mbela kita**



*[The main body of the page is a large, blank white area with a wavy top edge, intended for writing.]*



Blank writing area with a wavy top edge.